



TEKS UCAPAN DAN PERASMIAN

**YANG BERHORMAT SENATOR DATO' SETIA DR. HAJI MOHD
NA'IM BIN HAJI MOKHTAR MENTERI DI JABATAN PERDANA
MENTERI (HAL EHWAL AGAMA)**

PROGRAM :

**LIQA' MAHABBAH SEKRETARIAT DAKWAH KORPORAT JAKIM
BERSAMA KETUA-KETUA PEGAWAI EKSEKUTIF SYARIKAT-
SYARIKAT KORPORAT MALAYSIA DAN WAKIL TETAP SDK JAKIM
TAHUN 2024**

TARIKH :

18 APRIL 2025 / 19 SYAWAL 1446H

MASA :

9.00 PAGI – 12.00 TENGAHARI

TEMPAT :

HOTEL BANGI RESORT, BANDAR BARU BANGI SELANGOR

بسم الله الرحمن الرحيم
السلام عليكم ورحمة الله وبركاته
الحمد لله رب العالمين وبه نستعين
والصلاة والسلام على سيدنا محمد
وعلى اله وصحبه ومن اتبع هداه الى يوم الدين

[ALUAN]

1. Terlebih dahulu marilah sama-sama kita memanjatkan kesyukuran ke hadrat Allah S.W.T kerana dengan limpah kurnia dan inayah-Nya, dapat kita bersama-sama menghadiri Majlis Liqa' Mahabbah Sekretariat Dakwah Korporat JAKIM Bersama Ketua-Ketua Pegawai Eksekutif Syarikat-Syarikat Korporat Malaysia Dan Wakil Tetap SDK JAKIM Tahun 2025.
2. Walaupun dengan kesibukan masing-masing melaksanakan tugas di agensi dan syarikat masing-masing, pada hari ini dapat berkumpul dengan penuh rasa ikatan persaudaraan yang kukuh antara kita.
3. Apabila makin kerap bertemu, makin bertambah mesra sesama kita. Kita saling memahami tugas bersama, mudah-mudahan perjumpaan kita ini menjadi perjumpaan yang dirahmati dan perpisahan yang diampuni oleh Allah SWT.
4. Majlis ini merupakan antara program utama yang telah dirancang oleh JAKIM bersama-sama anggota tetap Sekretariat Dakwah Korporat (SDK) JAKIM. Program ini berkonsep 'Santai Silaturrahim Aidilfitri' melibatkan Jawatankuasa Tertinggi Sekretariat Dakwah Korporat JAKIM bersama Ketua-ketua Pegawai Eksekutif (CEO) syarikat korporat dan ahli tetap yang menganggotai Sekretariat Dakwah Korporat JAKIM.

Hadirin sekalian,

[SILATURAHIM DAKWAH KORPORAT]

5. Dalam era pengurusan yang semakin kompleks hari ini, saya sentiasa memberi ingatan kepada agensi-agensi Islam untuk memaksimumkan sumber manusia yang ada, selain perlu kreatif untuk mendapatkan keberhasilan yang tinggi. Ini tentunya menuntut satu pemikiran luar kotak serta memecahkan budaya kerja secara “silo”.

6. Kerja-kerja dakwah tidak boleh lagi dilaksanakan oleh satu pihak sahaja secara sendiri-sendiri. Seberapa banyak pihak perlu dilibatkan sebagai rakan strategik dalam kerja-kerja dakwah untuk memastikan hasil yang lebih baik. Apabila kita bergabung, ia menambahkan kekuatan kita. Ia perlu kepada penyelarasan dan disusun secara terancang atau dalam bahasa pengurusan kita sebut “well-organized” atau “well-planned”.

7. Sekretariat Dakwah Korporat JAKIM hari ini adalah model yang baik dalam kerangka dakwah. Kita mempunyai pelan pelaksanaan program yang kita gerakkan secara bersama antaranya pengukuhan pengisian ilmu di kalangan warga sektor korporat dan program Musa’adah CSR untuk membantu pihak yang memerlukan. Ini adalah usaha yang sangat baik.

8. Hari ini kita perlu bekerja dengan lebih kuat untuk membina semula kerohanian serta kekuatan dalaman masyarakat. Di samping kita memberikan bantuan-bantuan berbentuk material, sokongan daripada aspek ilmu dan spiritual mesti juga bergerak seiringan.

9. Hati dan jiwa perlu diisi dengan ilmu dan amalan kerohanian. Itu adalah kekuatan seseorang insan. Jadi di sinilah peranan Sekretariat Dakwah Korporat JAKIM bersama seluruh anggota. Memperkasa institusi Masyarakat Malaysia Madani perlu menjadi fokus kepada kita semua warga Sekretariat Dakwah Korporat JAKIM.

(PENDEKATAN DAKWAH MESTI MENGIKUT ZAMAN)

10. Pendekatan dakwah kita juga seharusnya seiring dengan zaman ini. Zaman ini pendekatan mesti ringkas, padat, berfakta dan interaktif. Adakalanya pendekatan 5 tahun lepas sudah tidak relevan dengan konteks dakwah hari ini. Kita mesti pantas mengadaptasi dengan suasana yang ada. Ini termasuklah dalam kerja-kerja dakwah. Uslub dakwah mesti sentiasa segar, interaktif dan relevan.

11. Saya telah dimaklumkan bahawa Sekretariat ini telah mempunyai Pelan Strategik sebagai asas dan halatuju bersama. Saya amat berharap pergerakan kita mengikut apa yang telah kita rancang dan susun bersama. Saya seronok melihat khususnya pihak syarikat-syarikat korporat yang aktif menggerakkan program-program CSR turun ke lapangan. Ini adalah satu perkara yang amat baik.

**YBhg. Datuk/Dato', Datin-datin, Tuan-tuan/ Puan-puan dihormati
sekalian,**

[MEMPERKASA KEKUATAN DALAMAN]

12. Sesungguhnya saya amat berharap agar Sekretariat Dakwah Korporat ini dapat melahirkan produk-produk dakwah korporat yang berimpak tinggi dan menjadi 'barisan hadapan' yang akan mengangkat imej serta prestij pengurusan gerak kerja dakwah negara khususnya dan sistem pengurusan hal ehwal Islam secara keseluruhannya.

13. Saya yakin bahawa semua wakil-wakil tetap Sekretariat Dakwah Korporat yang dilantik dapat bergerak bersama-sama. Tuan-Tuan dan Puan-Puan adalah nadi kekuatan kami di Jabatan Perdana Menteri (Hal Ehwal Agama).

14. Terima kasih sekali lagi saya kepada Ashabul Fadhilah Tuan-Puan semua atas kesudian menghadiri majlis pada hari ini. Tahniah dan syabas saya ucapkan kepada Bahagian Dakwah JAKIM atas komitmen tinggi menganjurkan majlis kita. Terima kasih juga kepada semua media yang hadir mewar-warkan usaha-usaha kita ini kepada masyarakat awam.

15. Dengan lafaz Bismillahirrahmanirrahim, saya merasmikan **Majlis Liqa' Mahabbah JAKIM bersama Ketua-Ketua Pegawai Eksekutif Syarikat Korporat Malaysia dan Wakil Tetap SDK JAKIM Tahun 2025** ini.

Wabillahi taufiq wal hidayah, wassalamualaikum warahmatullahi wabarakatuh.

Sekian, terima kasih.